

P.U. (A) 344.

AKTA CUKAI PENDAPATAN 1967

KAEDAH-KAEDAH CUKAI PENDAPATAN (PENENTUAN PEKERJA BERPENGETAHUAN, AKTIVITI YANG LAYAK DAN WILAYAH YANG DITENTUKAN) 2010

PADA menjalankan kuasa yang diberikan oleh perenggan 154(1)(b) Akta Cukai Pendapatan 1967 [*Akta 53*], Menteri membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Cukai Pendapatan (Penentuan Pekerja Berpengetahuan, Aktiviti yang Layak dan Wilayah yang Ditentukan) 2010**.

(2) Kaedah-Kaedah ini berkuat kuasa mulai tahun taksiran 2010.

Pemakaian

2. Kaedah-Kaedah ini hendaklah terpakai bagi—

- (a) orang yang layak yang telah membuat permohonan kepada Menteri, melalui Pihak Berkuasa Wilayah Pembangunan Iskandar, untuk tertakluk kepada cukai di bawah perenggan 1 Bahagian XIV Jadual 1 Akta dan yang permohonannya telah diluluskan oleh Menteri;
- (b) permohonan, yang disebut dalam perenggan (a), yang dibuat pada atau selepas 24 Oktober 2009 tetapi tidak lewat daripada 31 Disember 2015; dan
- (c) pendapatan yang diterima oleh orang yang layak daripada penggajian dengan syarikat yang ditetapkan mulai 1 Januari 2010.

Tafsiran

3. Dalam Kaedah-Kaedah ini, melainkan jika konteksnya menghendaki makna yang lain—

“orang yang layak” ertinya orang yang layak sebagaimana yang diperuntukkan di bawah kaedah 4;

“Pihak Berkuasa Wilayah Pembangunan Iskandar” ertinya Pihak Berkuasa yang ditubuhkan di bawah Akta Pihak Berkuasa Wilayah Pembangunan Iskandar 2007 [*Akta 664*];

“syarikat berstatus BioNexus” ertinya suatu syarikat yang diperbadankan di bawah Akta Syarikat 1965 [*Akta 125*] yang terlibat dalam perniagaan sains kehidupan dan yang diluluskan oleh Menteri;

“syarikat berstatus IDR” ertinya suatu syarikat—

- (a) yang diperbadankan di bawah Akta Syarikat 1965 dan bermastautin di Malaysia yang menjalankan aktiviti yang layak dalam wilayah yang ditentukan; dan
- (b) yang diluluskan oleh Menteri;

“syarikat berstatus MSC” ertinya suatu syarikat yang telah dianugerahkan, tertakluk kepada syarat-syarat penganugerahan itu, status MSC oleh Kerajaan Malaysia;

“syarikat yang ditetapkan” ertinya syarikat yang ditetapkan sebagaimana yang diperuntukkan di bawah kaedah 5;

“Wilayah Pembangunan Iskandar” mempunyai erti yang sama sebagaimana yang diberikan kepadanya di bawah Akta Pihak Berkuasa Wilayah Pembangunan Iskandar 2007.

Orang yang layak

4. (1) Orang yang layak ialah seorang individu yang—

- (a) merupakan warganegara Malaysia atau warga asing;
- (b) merupakan pekerja berpengetahuan sebagaimana yang diperuntukkan dalam perenggan 6(a);
- (c) tidak pernah memperoleh apa-apa pendapatan penggajian di Malaysia untuk sekurang-kurangnya tiga tahun sebelum tarikh permohonan yang dibuat di bawah perenggan 2(a);
- (d) digajikan dalam suatu aktiviti yang layak oleh syarikat yang ditetapkan dan yang penggajiannya bermula pada atau selepas 24 Oktober 2009 tetapi tidak lewat daripada 31 Disember 2015; dan
- (e) tinggal di dalam Wilayah Pembangunan Iskandar.

(2) Walau apa pun subkaedah (1), Menteri boleh menentukan apa-apa tempoh yang lain bagi maksud perenggan (c).

Syarikat yang ditetapkan

5. (1) Syarikat yang ditetapkan ialah suatu syarikat—

- (a) yang—
 - (i) diberikan status IDR, status BioNexus atau status MSC; atau
 - (ii) diperbadankan di bawah Akta Syarikat 1965 dan bermastautin di Malaysia; dan
- (b) yang menjalankan aktiviti yang layak dalam wilayah yang ditentukan di dalam Wilayah Pembangunan Iskandar.

(2) Walau apa pun subkaedah (1), Menteri boleh menentukan apa-apa syarat lain yang hendaklah dipenuhi oleh syarikat yang ditetapkan.

Pekerja berpengetahuan, aktiviti yang layak dan wilayah yang ditentukan

6. Bagi maksud Kaedah-Kaedah ini—

- (a) pekerja berpengetahuan ialah orang yang layak yang—
 - (i) memegang ijazah sarjana muda atau ijazah sarjana dalam mana-mana bidang profesional atau teknikal daripada suatu kolej, institusi atau universiti yang diiktiraf oleh Kerajaan Malaysia dan mempunyai sekurang-kurangnya sepuluh tahun pengalaman bekerja dalam mana-mana aktiviti yang layak; atau
 - (ii) memegang ijazah kedoktoran dalam mana-mana bidang profesional atau teknikal daripada suatu kolej, institusi atau universiti yang diiktiraf oleh Kerajaan Malaysia dan mempunyai sekurang-kurangnya lima tahun pengalaman bekerja dalam mana-mana aktiviti yang layak,

dan telah memenuhi apa-apa kriteria lain sebagaimana yang boleh ditentukan oleh Menteri:

Dengan syarat bahawa Menteri, boleh mengikut budi bicaranya dalam hal luar biasa, mengetepikan mana-mana kriteria dalam perenggan (a) daripada terpakai kepada mana-mana orang yang layak;

- (b) suatu aktiviti yang layak adalah sebagaimana yang dinyatakan dalam Jadual; dan
- (c) wilayah yang ditentukan ialah Nusajaya, Pembangunan Pintu Barat, Pusat Perniagaan Daerah Johor Bahru, Pembangunan Pintu Timur dan Skudai–Senai di dalam Wilayah Pembangunan Iskandar.

Pendapatan yang boleh dikenakan cukai

7. Jika orang yang layak mempunyai pendapatan berkenaan dengan penggajian dengan suatu syarikat yang ditetapkan dalam tempoh asas bagi sesuatu tahun taksiran, pendapatan yang boleh dikenakan cukai orang yang layak itu yang tertakluk kepada cukai di bawah Bahagian XIV Jadual 1 Akta hendaklah ditentukan mengikut formula yang berikut:

$$\frac{A \times C}{B}$$

- iaitu
- A ialah pendapatan kasar daripada penggajian dengan syarikat yang ditetapkan;
 - B ialah jumlah pendapatan kasar daripada semua punca;
 - C ialah pendapatan yang boleh dikenakan cukai daripada semua punca:

Dengan syarat bahawa dalam hal taksiran bersama di bawah subseksyen 45(2) Akta, jumlah pendapatan kasar daripada semua punca hendaklah termasuk pendapatan daripada isteri atau suami, mengikut mana-mana yang berkenaan.

JADUAL [Perenggan 6(b)]

Bioteknologi

- (a) Bioteknologi tani
 - bioteknologi tanaman
 - penemuan dan pemerdagangan keluaran semulajadi
 - bioteknologi ternakan
 - bioteknologi akuakultur dan marin
 - penyedia perkhidmatan penyelidikan kontrak (CRS) dalam pertanian
- (b) Bioteknologi industri
 - bahan api bio
 - bioremediasi
 - biokatalis dan enzim
 - bahan kimia halus dan khusus
 - bahan bio
 - reaktor bio

- (c) Bioteknologi penjagaan kesihatan
- organisasi perkilangan kontrak bagi sektor bioteknologi penjagaan kesihatan
 - organisasi penyelidikan kontrak (CRO)
 - organisasi penyelidikan klinikal
 - perkhidmatan perkilangan dan penyelidikan kontrak (CRAMS)
 - biofarmasi dan farmasi
 - penemuan ubat-ubatan dan sistem penyampaian ubat-ubatan

 - peralatan perubatan dan kit ujian molekular diagnostik “in-vitro”
 - sel stem, kejuruteraan tisu dan kejuruteraan genetik
 - vaksin
 - bioinformatik

Teknologi hijau

- (a) Sektor tenaga
- (i) Sektor bekalan tenaga
- penjanaan kuasa
 - tenaga yang boleh diperbaharui
 - pengurusan bekalan sampingan
 - penjanaan bersama
- (ii) Sektor penggunaan tenaga
- kecekapan tenaga
 - pengurusan permintaan sampingan
- (b) Sektor bangunan
- reka bentuk
 - pembinaan
 - pengurusan dan penyelenggaraan
 - merobohkan bangunan
- (c) Sektor pengurusan air dan sisa
- pengurusan dan penggunaan sumber air
 - rawatan sisa air
 - sisa pepejal dan tanah isian sanitari
- (d) Sektor pengangkutan
- infrastruktur pengangkutan
 - kenderaan
 - bahan api bio
 - pengangkutan darat awam

Perkhidmatan pendidikan

- (a) universiti
- (b) kolej
- (c) institut latihan kemahiran
- (d) institut penyelidikan dan pembangunan
- (e) pusat latihan serantau

Perkhidmatan jagaan kesihatan

- (a) hospital dan pusat perubatan tradisional dan komplementari
- (b) perkhidmatan pergigian dan ortodontik bersepadu
- (c) penyelidikan dan pembangunan jagaan kesihatan
- (d) perkhidmatan makmal bersepadu

Industri kreatif dan perkhidmatan berkaitan

- (a) perkhidmatan kreatif dan reka bentuk
- (b) perkhidmatan pengurusan kreatif
- (c) filem dan televisyen
 - praproduksi
 - produksi
 - pasca produksi
 - pengedaran
- (d) permainan dan animasi
 - rekaan kandungan
 - produksi
 - pasca produksi
 - pengedaran
- (e) penjana dan pengiklanan kandungan dalam talian dan bergerak
- (f) agregat dan *enabler* kandungan dalam talian dan bergerak
- (g) penyelidikan dan pembangunan kreatif
- (h) pengedaran dan pemasaran kandungan kreatif
- (i) perkhidmatan media dan kandungan bersepadu
- (j) seni tampak dan persembahan

Perkhidmatan nasihat dan perundingan kewangan

- (a) perkhidmatan kewangan Islam
- (b) perniagaan proses penyumberan luar atau luar pesisir
- (c) perkhidmatan perundingan dan nasihat korporat

Perkhidmatan logistik

- (a) perkhidmatan rangkaian pembekalan bersepadu
- (b) perkhidmatan dan penyelesaian rangkaian pembekalan bernilai tinggi

Pelancongan

- (a) hotel
- (b) taman tema, pusat hiburan dan hiburan keluarga dan pusat budaya
- (c) pusat persidangan dan pusat pameran
- (d) operasi serantau perkhidmatan hotel dan libur

Dibuat 29 September 2010

[Perb.0.3865/73 (SJ. 74) Jld. 4; LHDN 01/35/(S)/42/51/231-17.11;
PN(PU²)80/LX]

DATO' SERI HAJI AHMAD HUSNI BIN MOHAMAD HANADZLAH
Menteri Kewangan Kedua

[Akan dibentangkan di Dewan Rakyat menurut subseksyen 154(2) Akta Cukai Pendapatan 1967]